

求恕齋
叢書

雪橋詩話續集

二

雪橋詩話續集卷第二

遼陽楊鍾義撰集

吳興劉承幹參校

上虞王梅林德璘東臯草堂詩馮山公爲之評定送季弟清獻出游云身欲許人須念母書頻寄我莫忘家
蘭州郝壁仲趙有崑岑集寄懷舍弟歷兼東石若玢云
有弟蘭山守墓田別來西極數經年關河鐵馬仍留牧
荆棘銅駝已盡遷升屋招魂空社鼠還家說夢對鸛鵒
痛深惝眼難高望記到良朋各黯然蓋避地懷鄉之作
客廣陵有竹枝詞云紅香堆裏雪光明一簇芙蓉淺暈

生共戲鵝兒拋彈子見他條脫臂砂輕臨潼王孫蔚茂
衍赤壁云溪上青楓江上山西陵秋色有無閒小航商
略琴尊具如此月明須往還早發峽石驛云西巖馬首
下層霄秋樹平明煙未消寂寂空亭人不見霜吹紅葉
過山橋湘行云何處當年洗筆池藤梢橘刺暗芭籬輕
舟自向青溪過一路空山叫畫眉詩情婉約西北詞人
之翹楚也

謝方山刑部爲清義相國子漁洋序其所著杏村集曰
去膚存骨去枝葉存老幹其賞甚稀存之以待元次山
杜清碧其人定相賞於絃指之外臨清汪灝送方山告

歸詩真得意時惟嘯詠不如人處是功名潘次耕之試
鴻博由左諭德盧琦及方山薦舉亭林至都嘗主其家
祁縣戴延鉞楓仲博學好古家多藏書所居丹楓閣圖
書鼎彝羅列左右人方之倪迂清閼顧寧人乙卯至祁
縣主其家將築室祁之南山楓仲力任之李子德答楓
仲見懷詩所謂漢室聞遺老君爲築草亭者也亭林因
之置書堂取所藏經史暨明累朝實錄插籤於架竹垞
分書題柱卽此地

郭傳芳字九芝一字獻素大同威遠衛人由選貢授咸
寧縣佐攝郃陽長安篆俱有聲遷富平令滇逆之變涼

寇竊發九芝偵賊將入境乘霧擣巢斬獲有功輸輓旁
午民不告勞亭林以康熙十七年由大原入關中迎之
於二十里外亭林與潘次耕書云頻陽令郭公旣迎中
孚僑居其邑今復遣人來迎可謂重道天生遂欲爲我
買田結婚之計雖未可必然中心願之矣天生陳情歸
賦雲中曲呈郭明府有云晨起呼童秣吾馬爲公親介
初度觴前年是日杯相屬左有東吳右二曲亭林出游
嵩少九芝又迎傅青主入關天生是詩有今此二妙跡
稚遠太原徵君聲光續之句華陰令遲屏萬維城又字
闇生廣寧人亭林因朱子曾主管雲臺觀謀爲建祠屏

萬任其事捐俸爲倡亭林朱子祠堂上梁文有云重邀
茂宰贊此良圖萃人力以作新捐緡錢而倡導天生詩
云靈臺樹接紫陽祠適館陶潛附一枝隔代虛傳提舉
祿新宮兼致草堂資謂此事也兩君好賢之風不可以
無紀

渠縣李璿梅岑片石齋集佳句如泉石近知何處隱風
煙遙接故園愁漢廷近詔寬三甲蜀道何年鑿五丁將
軍自許標銅柱長吏誰曾過石壕久客未聞生馬角累
人何止媿豬肝時巴蜀用兵多憂生念亂之意其弟珪
公執說劍齋集聞官軍收漢中成都云天險誰終踞先

聲已不支傳聞收宋建遂已殪姜維王者師無戰流人
喜可知翻愁雲棧路雨雪擔簷遲已分歸無計朝來涕
淚新誰傳今日信吾是再生身月冷創夷色花殷鼓角
春安危爭撫虐跂望轉傷神此順治九年作公執以丁
酉舉人宰閩之寧德其三山雜感云珠簾繡柱城西路
父老猶誇未戰前他日尉陀專璽綬幾年楊僕擁樓船
春城晝閉飛飛燕野水晴看跼跼鳶只有無諸臺畔草
東風依舊綠芊緜青絲珠絡散平蕪二月春郊草尙枯
宛馬自來甘苜蓿魯人今復峙菱芡空村夜釀傭身值
廣陌晨飛趣市符蒿目遺民成痛哭五年剜肉給征輸

時耿氏王閩重斂勞怨徐興公以布衣致書數萬卷建
偃曝樓聞亂樓書無恙至是徙其家書遂散失讀此詩
及陳份石獅歌皆哀憫創夷可見國初三藩之爲民患
陸翼王徵士學本陶菴晚益精實已未舉鴻博抵京夢
陶菴手書碧血二字以示入試遂不終卷以不入格而
罷徐健菴贈句云早年講舍依黃憲壯歲生徒似李膺
周子倣贈翼王詩君是左徒門下士竭來相對哭途窮
遺孤袁粲累愁日亡命王成質保中書館三餘淹夜雨
客顏一瘦怯秋風結交世上黃金滿四海何曾及此翁
沈埭士謂翼王當有保全遺孤之事故專及之考張樸

村所撰翼王墓誌先生少師侯廣成之弟雍瞻陶菴致
命雍瞻亦被逮先生急排闥挾其孫檠與俱且視所藏
書搜取侯氏先世及廣成父子遺文與夫雍瞻所作凡
數十束載小舟潛去閒道入越中事平乃與檠俱返子
俶詩卽指其周旋侯氏之難而言陳其年贈陸菊隱序
略云粵以龍蛇之年遂應魚羊之讖普天瓦解列鎮茅
靡羸苒盡作俘囚樂卻悉班氓隸庾開府著傷心之賦
五福無徵馮曲陽製自序之文三靈獲譴斯時也齊國
忠臣猶稱王蠋楚邦義士尙說包胥落落戈船雨暗吳
江之棹蕭蕭戰艦煙迷歇浦之帆惟我膠城獨推上谷

釃酒而談登陴以誓袁本初子弟俱願相從庾元規賓
從皆能自效三日哭於都亭六軍盟于別館當年夏馥
曾聞嫋姬之親此日黃瓊亦有門徒之誼其爲犄角相
與藩維然而烏頭未白河水難清空埋地下之愁不救
天公之醉痛龐涓之箭盡兩曜無光悲項籍之途窮三
川流血一門爭死七尺無歸藐爾諸孤行將焉及又曰
自稱擊筑之傭謬作賣珠之客重關半夜私出田文複
壁三年深藏張儉閭闔亡命猶授孝經涕泣避仇每傳
論語齊朝才士半知袁粲之孫晉室諸卿漸錄趙衰之
後將謂少孤不死庶幾亡者復生詎意遺珠又成破鏡

王規玉折時事可知徐悱蘭摧天心已矣又日照隣失意居惟病梨蕭棕去國歌成落葉弔棠梨而無館臨酸棗而非臺湘水三閭假餐英以適志潯陽五柳聊采秀以攄懷仙人餌以長生潔士因之玩物芊緜悽惻翼王自號菊隱之志昭然矣翼王館京師久文學侍從之臣每被 顧問徵用故實考所從出有未能對者輒退而訪之翼王爲具道某書某事舉其詞與其首尾卽檢書以驗無一誤者人各如其意所欲得購宋元明人經說輒爲題跋經義攷多取其言爲据李湯孫送翼王南歸有山中大隱徵宏景海內奇書問鄴侯之句有菊隱集

其送文介石學博歸滇南云嶺客頻年賦式微今朝纔
見理征衣三江日月孤臣老六詔風煙萬里歸山過碧
雞多戍鼓星窮朱鳥近親聞好音爲寄東來驛莫道南
天少雁飛

周子倣病中元夕有感云逢年漫媿天人策涉世寧諳
長短經顧伊人閱江樓云碧草自生宮寢路青山仍遶
帝王州王虹友張文獻公祠云只道主由金鑑致豈知
兵爲玉環來許九日過廢園有感云到公死後空存石
謝傅亡來久廢琴王異公贈杜于皇云人驚夔府貧來
句世重樊川亂後名王懌民揚州次梅村韻云百年洛

蜀關時運六代煙花兆甲兵王次谷端午先忌云三閭
怨在餘香草九地恩深廢蓼莪太倉十子之詩大抵專
尙風華梅村之所熏習也其三人則王端士黃庭表王
惟夏

嘉善魏坤禹平送少司馬楊以齋先生予告終養歸里
次悔餘韻云行詣誰從末俗論性情今見衮衣人喜當
海宇銷兵日許乞林泉將母身得失不須分出處去留
總是戀君親馬蹏篤速行何亟肯待河流泮早春以齋
早以諫獵受

世祖知厯三垣三載疏前後三十上明季東南文士倡

爲復社海內應之著錄者二千餘人其後十室之邑三家之邨莫不立有文社蒞牲以盟張樂而宴與者結路人爲弟昆道不同則親懿視同仇敵凶終隙未靡所不有公上言朋黨之禍釀於草野欲塞其源必先杜絕盟社得 旨敕學臣嚴禁初釋褐知高要以幣聘朱竹垞課其子中訥世所稱晚研先生也官中允工草書孫卽次也太守

丹陽湯寅贈筴江上柱史云由來勝地自林泉卻憶金門已十年狂酒牧之眞御史著書宏景是神仙韭花作字春移楊桃葉迎歌夜泊船祇是避名居谷口論詩今

更萬人傳江上工書畫精鑒賞官御史直聲震朝野棄
官去不知所終鬱岡埽葉道人其別號也嘯亭主人謂
有金氏子隨舅氏某之官甘肅遇道士於漢龍山年九
十餘作江南語狀貌偉然頗善書法自云曾爲諫職以
劾權相去官自稱繡髮山人不言姓字里居金氏子屢
叩之不告也及歸告諸士大夫皆云其狀彷彿侍御然
終無左證

康熙閒明史開局天文志爲吳志伊所修徐敬可劉繼
莊各有增定敬可名善秀水諸生明亡儉德韜晦著有
流寇紀年莊子七篇周髀密法會通弧矢六宗諸書燼

於火詩曰囂谷遺稿初夏偶作云細數韶華覽鏡邊頭
須不信已皤然休教遠憶銅臺日便可虛張柏寢年生
亦有涯吾分定春今何事夢猶牽衰殘只合忘機去更
結青山未了緣江郊幾度喚提壺果喜高陽尙有徒泛
宅豈宜論去住酒天從此入虛無箏人倚處垂楊裊雉
子斑時小麥枯擬趁麰車花外駐夕陽城闕又荒蕪春
來稍喜塞烽遲文酒爭開罷戰時一夕西園留勝賞千
秋東觀接風期支離媿享三鍾逸鞠臚終非二斗宜城
角尙悲花欲盡莫教征夢更天涯城南半畝舊柴關碧
蔓丹葩露井殷容膝有樓非百尺冥心無夢不干山溪

流四注蓮花巷

所居在四蓮花橋

雉堞平臨楊柳灣疏嬾未諳

邀轍迹席門苔繡正斑斑

楊柳灣在舍西百餘步

審其詞意係史

局感興之作嘗杖策徧歷名山水其過泰山詩云豈意
神靈宅衰年得覓經風沙三百里一片馬頭青空曲蟠
龍虎觚棱挂斗星白雲朝暮起常護漢臣銘

嘉興曹偉謨秦淮竹枝詞輕輕斷送南朝事一曲春燈
燕子箋自是快語桐鄉沈中棟隆九秣陵雜詠云浪游
未得買歸船料理春寒旅思牽閒補秣陵風土志新年
門戶貼花箋長千古寺埕峻嶒乘興掘衣一再登不管
人閒興廢事孤僧日禮佛前燈此江南初定時作漢陽